

# Txirritola

ARAMAIO / Barikua / 2004ko urtarrilaren 16a / 92. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

## Plastikoak batzeko edukiontzia ipiniko ditu laster Udalak

UBANE MADERA

Udaleko Zerbitzu Saileko buru Andres Osinaga zinegotziak jakinarazi digunez, laster edukiontzi horiak ipiniko dituzte herrian. Plastikoak batzeko ontziak dira hori kolorekoak. Ibarraz gain, auzo guztietan ipiniko dituzte edukiontzia, bakoitzean bana.

Oraingo astean, postal berezi bat bidali du Aramaioko Udalak herritarren etxebizitzetara. Edukiontzi horien gaineko postala da. Izan ere, Udalak kanpaina berezia abiarazi du plastikoak batzeko edukiontzien gainean. Hala, kanpaina horren barruan, 15 egun barru, edukiontzi txiki bana emango du Udalak Aramaioko etxe bakoitzeko. Plastikoak batzen hasteko edukiontzia da. Izan ere, Udalak aurrez ikusi du hil honen amaieran hasiko dela plastikoak batzen, gero birziklaturaz eramateko.

Oraindik xehetasun guztiak erabaki barik daude, baina seguru aski Ibarren lau edukiontzi hori ipiniko dituzte, eta auzoetan bana. Espero dute 15 bat egunean ontziak beteko direla; hortaz, hamabostean behin hustuko



U.M. laz ipini gura zituzten edukiontzia, baina ez zuten aurrekonturik.

dituzte. Batutakoa Gasteizera eramango dute, Jungizen dagoen instalazio batera. Edozelan ere, edukiontzia erabili ahal zehaztuko dituzte erabiltzeko moduak.

### OLIOAK BATZECO EKIMENA

Bestalde, birziklapenarekin lotutako kontuekin segituz, Andres Osinagak jakinarazi digu oraingo astean hasi direla etxeko olio

batzeko erabiliko duten txabola konpontzen. Elosu enpresak egingo ditu lanok. Eta esandakoaren arabera, nahiko laster bukatuko dituzte.

Hori bai, lanak bukatu ostean, olio batzeko ontzi egokiak aukeratu beharko dituzte, herritarrek edozein momentutan erabili ahal izatekoak... Edozelan ere, asmoa da laster hastea olio batzen.



## Espainiako gerrako kaskoa Zabolan

Jorge Errasti barajuendarrak 36ko gerrako kaskoa aurkitu du Zabola inguruko basoan. Hark kontatu digunez, ehizean zebilela, kazola bat aurkitu zuen erreka bazterrean; baina, kazola hartu zuenean, kaskoa zela ikusi zuen; Arangiotik hasi eta Asentzioko, Kurtzetako, Tellamendiko eta inguruko mendi-gainetan egon ziren trintxeren lekukoa. Auzokideek eskatuta Barajue-nera ekarri zuen gerrako erlikia, eta han dago, ondo gordeta.

## LABUR

### Urte berriko aurreneko osoko bilkura egingo dute datorren eguaztenean

Eguaztenean 18:00etan hasiko da udalbatzarra. Besteak beste, honako gai hauek aztertuko dituzte zinegotziek: herri barruan egiten diren lan handien kartelak euskaratzea eta hori zelan egin; Azkoagako hilerriaren gaineko eskaera; musikarekin lotutako dirulaguntza eskaera; eta Oletako lanen bigarren zatia.

### Bihar Arabako Taldekako Bertsolari Txapelketako finala jokatu dute herrikoek

Joan den asteburuan Trebiño aldean ibili eta gero, bihar, zapatua, beste ekinaldi bat egin beharko dute Aramaioko bertso-eskolarakoek. Izan ere, Arabako taldekako txapelketako finala jokatu dute Agurainen. 14:00etan hasiko da txapelketa, Aguraingo Zertu jatetxean. Ea, bada, etxekoek zortea duten!

### Txarribodarako erositako txerriak hanka egin zueneko istorio laburra

Kontatu digute zela Zabolako Arritzeko Antoniok txerria erosi zuen Artzen. Txarribodarakoa. Hala, karroan sartu eta etxera eramanez. Baina etxera iristean... txerriak ez! Eskerrak hantxerriak gutxira Artzekoek deitu ziotela esanez txerria harrapatu zutela; Txarribodarik nahi ez, eta hanka egiten ahalegindu zen animalia gaixoa.

## Zenbait dirulaguntza eskatzeko epea zabaldu berri dute

U.M.

Udalak jakinarazi digu zenbait dirulaguntza eskatzeko epea zabalik dagoela. Hain zuzen ere, elkarte edo fundazioendako, erakunde publikoendako eta gizarte zerbitzuen inguruan jarduten dutenentzako da deialdia. Batzuek urtarrilaren 31ra arteko epea dute; besteek otsailaren 15era artekoa.

Hain zuzen ere, gizarte zerbitzuekin lotutako jarduerak izango dute urtarrilaren 31ra arteko epea; eta gainerakoek otsailaren 15era artekoa. Edozelan ere, guztiek Gizarte Ongizaterako Foru Eraikinean

egin beharko dituzte eskaerak, Gasteizko Diputazio kalean.

### ELKARTE EDO FUNDAZIOAK

Irabazi asmo bariko elkarte edo fundazioek eska ditzakete dirulaguntzok, hiru zereginetarako: gizarte zerbitzuen oinarriko ekipamenduak gaitzeko edo berritzeko; egokitzeko, zaintzeko edo hobetzeko; eta ekipamenduak edo altzariak erosteko.

### ERAKUNDE PUBLIKOAK

Erakunde publikoen kasuan, laguntza eskatzeko derrigorrezkoa dute zentroaren edo zerbitzuaren titularitatea edo kudea-

keta euren izatea. Hala izanda, dirulaguntza lau zereginetarako eska ditzakete: zentroa gaitzeko edo berritzeko; egokitzeko, zaintzeko edo hobetzeko; ekipamenduak edo altzariak erosteko; eta auzolanerako materiala erosteko.

### GIZARTE ZERBITZUAK

Eta gizarte zerbitzuei dagokienez, prebentzio edo gizarteratze lanak egiten dituztenek edo gizarte laguntzak ematen dituztenek eska ditzakete laguntzok; euren programak eta jarduerak aurrera eramateko.

Informazio gehiago behar izanez gero, udaletxean eska daiteke.



# Abiarazi dute pentsiodunendako 2004ko bainuetxeetako programa

UBANE MADERA

**Urtarrilaren 31ra arteko epea dute pentsiodunek bainuetxeen programan lekua hartzeko, otsailetik abuztura arteko txandarako. Bestela, maiatzaren 16ra arteko astia dute.**

IMERSOK abiarazi du 2004ko bainuetxeetako programa. Hala, Andaluzian hasi eta Euskal Herriraino 14 erkidegotako bainuetxeak dituzte aukeran pentsiodunek, 15 egun pasatzeko.

Ohi bezala, bi txandaren artean aukeratu beharko dute: otsailetik abuztura eta irailetik abendura. Lehenengo txandan lekua hartzeko, urtarrilaren 31 baino lehen egin beharko dute eskaera; eta bigarreneko, maiatzaren 16a baino lehen.

## NON EGIN ESKAERAK

Posta arruntez aurkez daitezke eskaerak, edo bestela norberak eramane dituzke honako lekuren batera: hirugarren adineko zentroetara edo interesdunak gertuen duen IMERSOren zuzen-



Erretiratuek, alargunek edo ezintasunen bat dutenek eska dezakete lekua.

daritza probintzialera; IMERSOren zerbitzuak ematen dituzten erakundeetara edo IMERSOren zerbitzu orokorretara.

Behin aurkezteko epeak bukatzen direnean, hartutako eskae-

ra guztiak aztertu egingo dituzte honako baremoen arabera: bainuetxeetako tratamenduak jasotzeko beharra, eskatzaileen egoera ekonomikoa eta adina eta aurreko urteren batean halako

ekimenetan parte hartu ez izana. Edozelan ere, eskatzaileei etxera bidaliko diete hartutako erabakia.

## BETE BEHARREKO BALDINTZAK

Honako baldintzak bete beharko dira bainuetxeen programan parte hartzeko: gizarte-segurantzako pentsioduna izatea erretiroarengatik, baliaezintasun batengatik edo alarguntasunarengatik; bizikidetzari kalte egingo dion buruko gaixotasunik edo gaixotasun kutsakorrik ez izatea; egunerokotasunean nor bere kabuz baliatu ahal izatea; bainuetxeetako tratamenduen beharra izatea eta haiekiko kontraindikaziorik ez izatea eta eskaera egiteko baldintza guztiak betetzea.

## BAINUETXEEN ESKAINTZA

Bainuetxeen programak zera eskainiko du: 15 eguneko mantenu osoa eta oinarritzko tratamenduak (osasun azterketa eta jarraipena eta norberak behar duen tratamendua) eta aseguruak.

Horren gaineko informazio zabalagoa behar izanez gero, Aramaioko udaletxean eska daiteke.

## BOTEPRONTOAN/ Eneritz Mondragon · Udaletxean praktiketan

# “Gazte lokalen kasuan, uste dut burugogorkeria apur bat dagoela alde bien partetik”

Zuetako askori ezagun egingo zaizue Eneritz Mondragon, azkenaldian udaletxean dabil-eta lanean. Praktikak egiten dabil joan den azaroaz geroztik Goikolaba baserriko gaztea. Otsailera arte izango da udaletxeeko harreraren:

**Orain artekoa ikusita, zer pentsatu zaizu udaletxeeko lana?** Interesgarria. Herriko mugimendu guztiak ikusten dituzu, herritarrei lagundu egiten diezu...

**Lehenagotik ezagutzen zenuen lan hori?**

Bai. Unibertsitatean hasi nintzenean, Judithi galdetu nion ea bazegoen lanik niretako. Hala, Herrietan aldizkaria banatzeko deitu zidaten aurreneko aldiz; gero, zigilatzeke... **Gertutik ikusita zelako harremana dago herritarren eta Udalaren artean?**

Dezente ona. Jendea etortzen da, galdetzen du beldur barik, telefonoz ere deitzen dute... Batzuek aurpegi gogorragoa dute eta gehiago aurpegiratzen dituzte txarto egindakoak; baina bestela, arazo barik. **Egokitu zaizun gertaera bitxi...** Gaur bertan pasatu zaidana. Hiru perutar etorri dira, gizon



*“Interesgarria da udaletxeeko lana; herriko mugimendua ikusten dut”*

bi eta emakume bat. Lan bila etorri dira. Nik ez nekien zer erantzun eta Judithengana bidali ditut. Eta aurreko batean beste mutil bat etorri zen galdetzen ea Aramaion bazen alokatzeko etxebizitzarik. **Izan ere, geroago eta jende gehiago dator Aramaiora bizi izatera. Igartzen duzue hori?** Kanean bai. Mugimendu handiagoa dago. **Hortaz, kanpotik datozenak ibiltzen dira herrian...** Ez asko. Umeak dituztenak bai. Haiek gehienbat parkean egoten dira umeekin; baina umerik ez badute, lotara bakarrik etortzen dira. **Ona da jendea etortzea?** Nik baietz uste dut. **Praktiketan ibili beharrean alkate zango bazina eta ez bazenu mugarik izango, zer egingo zenuke Aramaion?**

*“Kanpotik etortzen diren gehienak, umerik ez badute, lotara bakarrik etortzen dira”*

Igerilekua, txikitatik daukadan nahia da. Hala ere, garrantzitsua iruditzen zait gazte kontsideratzen garen guztiondako lekua edukitzea. Gure sasoiari ordu mordo eman genuen udaletxeeko arkupean. **Gazte lokalak aipatuz, zelan ikusten duzu arazo hori?** Orain arte izandako liskarren ondorioz, bai gazteak eta bai Udalekoak nahiko burugogor daude euren iritziekin. Nire ustez, normala da, hainbat aurreiritzi dituztelako gertatutakoarengatik. Baina kontuan hartu behar da lokal eroso bat dagoela hutsik eta diru nahiko inbertitu dutela. Horregatik Udalekoei eskatuko nieke koadrila handi horren adinaren muga handitzea eta baita eurekin fidatzea ere. Eta gazteei inplikazioa eskatuko nieke hainbat ekintza antolatzen (jaiak, irteerak, gazte mugimenduak...). Eta lokalera berriz sartzen badira euren artean antolatzea lokaleko garbiketarak eta konponketarak egiteko. **Udaletxeeko lanera bueltatuz, zer eskatuko zenieke herritarrei?** Pazientzia apur bat. Gauzak bizkorregi nahi dituzte batzuetan, eta ez dute ikusten atzetik egin behar den lan guztia.

## TELEFONO JAKINGARRIAK

OSASUNA / LARRIALDIAK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal Kiroldegia	945 44 53 35
Postetxea	945 44 50 83
Zuiako Eskualdea	945 43 01 67
Suhiltzailleak (Zubillaga)	943 78 28 00

## AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00	10:15*	
11:00	11:15	
12:00	12:15*	13:00
15:15	15:30	16:15
17:20	17:35	
18:30	18:45*	19:30
19:00	19:15	
21:00	21:25	

  

GASTEIZ	ARAMAIO	ARRASATE
	07:50	08:05
08:20	09:00	09:15
	10:15	10:30
	11:15	11:30
13:10	13:45	14:10
16:20	17:00	17:20
	17:35	17:50
	19:15	19:30
19:30	20:10	20:25

**OHARRA:** izartxoan duten orduetan eskaeraren arabera zerbitzua eskaintzen dute. Auzoetako bizilagunei zuzendutako da, eta autobusa erabili gura badute, bezperan deitu beharko dute honako zenbaki honetara: 629 54 59 23

## OHARRAK

### BAÑERAKOEN EMAITZAK

Joan den asteburuan, mutilen taldeak bakarrik jokatu zuen partidua, nesken taldeari atseden hartzea egokitu zitzaion-eta. Hala, emaitza polita ekarri zuten etxera; izan ere, 8-5 irabazi zioten Kanpetzuko Kostalerari. Bihar, zapatua, mutilek etxean jokatu dute, 11:00etan, Diocesanas Nieves Cano taldearen kontra. Eta neskek Aldaben izango dute partidua, 12:30ean, Olabideren kontra.

### ZINEMA

Oraingo domekan *The Dornberrys* filma emango dute.

### TXOTX ITURRIETAN

Iturrieta sagardotegikoek atzo, eguena, zabaldu zuten aurtengo sagardo denboraldia. 20:00etan egin zuten txotx, oraingo honetan Toti Martinez de Lezea idazle arabarraren eskutik. Horrez gainera, giroa berotzen herriko trikitilariak, txalapartariak eta bertsolariak izan ziren, baita zenbait herritar ere gonbidatuen artean.